



# Lög Handknattleikssambands Íslands

## I. kafli Almenn ákvæði og hlutverk

### 1. gr. Heiti og aðsetur

Handknattleikssamband Íslands, (HSÍ), er samband héraðssambanda og íþrótta-bandalaga þeirra félaga sem iðka, æfa og keppa í handknattleik innan ÍSÍ.

Aðsetur HSÍ og varnarþing skal vera í Reykjavík.

Merki HSÍ sýnir knött með HSÍ skammstöfunina. Bókstafir eru í íslensku fánalitinum og knöttur er brúnn.

Fáni HSÍ er hvítur með merki HSÍ í miðju og orðin „Handknattleikssamband Íslands“ efst í fána.

### 2. gr. Hlutverk og tilgangur HSÍ

HSÍ er æðsti aðili handknattleiks á Íslandi og er hlutverk þess í megin atriðum:

- a. að hafa yfirumsjón allra íslenskra handknattleiksmála
- b. að vinna að eflingu handknattleiks í landinu
- c. að vinna að stofnun nýrra aðildarfélaga
- d. að setja íslenskum handknattleik nauðsynleg lög og reglur og sjá til þess að þeim sé fylgt
- e. að löggilda dómara, þjálfara menn til dómara starfa og veita þeim réttindi
- f. að standa fyrir og úthluta handknattleiksmótum
- g. að standa vörð um uppeldislegt gildi handknattleiks á Íslandi
- h. að tefla fram landsliðum og félögum í alþjóðlegri keppni
- i. að koma fram erlendis fyrir hönd handknattleiks á Íslandi
- j. að vinna að öðrum þeim málum er varða handknattleik á Íslandi

HSÍ starfar sjálfstætt og er hlutlaust er varðar stjórn mál og trúarbrögð. HSÍ skal gæta jafnréttis og jafnræðis. Allir skulu vera jafnir fyrir lögum, reglugerðum og ákvörðunum HSÍ og nefnda á vegum HSÍ. Aðilar skulu njóta fullra réttinda án tillits til kynferðis, kynhneigðar, trúarbragða, skoðana, þjóðernis, kynþáttar, litarháttar, efnahags, ætternis og stöðu að öðru leyti.

### 3. gr. Aðild að samtökum

HSÍ er aðili að:

- a. Íþrótta- og Ólympíusambandi Íslands, (ÍSÍ)
- b. Alþjóðahandknattleikssambandinu, (IHF)
- c. Handknattleikssambandi Evrópu, (EHF)



HSÍ skal gæta samræmis við reglur og ákvarðanir ÍSÍ og sjá um að reglur varðandi handknattleik séu í samræmi við alþjóðareglur. Reglur og ákvarðanir HSÍ eru bindandi fyrir aðila að HSÍ; félög, leikmenn, dómara, þjálfara, forystumenn og aðra þá sem eru innan vébanda aðildarfélaga HSÍ.

## **II. kafli Aðild að HSÍ**

### **4. gr. Réttur að aðild**

Öll félög innan ÍSÍ er æfa, iðka og keppa í handknattleik eru aðilar að HSÍ.

### **5. gr. Réttindi og skyldur aðildarfélaga**

Öll aðildarfélög HSÍ hafa rétt til að taka þátt í mótum sem eru skipulögð á vegum HSÍ.

Allur handknattleikur skal fara fram samkvæmt lögum, reglugerðum og ákvörðunum HSÍ og ÍSÍ og alþjóðlegum, (IHF), leikreglum sem samþykktar hafa verið af HSÍ og ber aðildarfélögum skylda til þess að virða þær reglur.

Félag sem tekur þátt í mótum á vegum HSÍ ber að sjá til þess að leikmenn, þjálfarar, dómara og forystumenn innan vébanda félagsins virði lög, reglugerðir, reglur og ákvarðanir HSÍ, IHF og EHF.

Félag sem tekur þátt í mótum á vegum HSÍ er skylt að virða ákvarðanir stjórnar HSÍ, nefnda HSÍ og dómstóla innan íþróttahreyfingarinnar.

Héraðssamböndin og íþróttabandalögin eru milliliðir milli félaga sinna og stjórnar HSÍ. Héraðssambönd, íþróttabandalög og aðildarfélög skulu senda stjórn HSÍ skýrslu um öll handknattleiksmót sem þau halda og ársskýrslur sínar sé þess óskað.

Aðildarfélög HSÍ skuldbinda sig til að vinna að því að koma í veg fyrir lyfjamisnotkun.

Aðildarfélög HSÍ skuldbinda sig til að vinna að því að koma í veg fyrir óeðlilega þátttöku sinna félagsmanna í veðmálastarfssemi.

Aðildarfélög HSÍ skulu halda bókhald yfir starfssemi sína í samræmi við gildandi lög og reglur um bókhald.

Aðildarfélög HSÍ skuldbinda sig til þess að vera ekki aðilar að öðru handknattleikssambandi eða taka þátt í mótum á vegum annars handknattleikssambands nema með sérstöku samþykki HSÍ, IHF eða EHF.

Aðildarfélag er brýtur gegn ofangreindum skyldum skal hlíta viðurlögum þeim sem nánar eru ákvörðuð í lögum þessum, lögum um dómstóla HSÍ og reglugerðum HSÍ.

Leikmenn aðildarfélaga skulu vera skráðir í samræmi við reglugerð HSÍ.



## 6. gr. Aðrar skyldur.

Aðildarfélög, HSÍ, leikmenn og aðrir innan HSÍ skuldbinda sig til að leika handknattleik í samræmi við ákvæði þessara laga, siðareglna og reglugerða HSÍ og í samræmi við lög og reglur IHF og EHF.

Ef ákvæði reglugerða og leikreglna HSÍ stangast á við eða ganga lengra heldur en reglur IHF eða EHF, þá gilda reglugerðir og leikreglur HSÍ.

## III. kafli Skipulag HSÍ

### 7. gr. Stjórnkerfi HSÍ

Málefnum HSÍ stjórna:

- a. handknattleiksþing sem fer með æðsta vald í málefnum HSÍ og setur lög sambandsins.
- b. stjórn HSÍ sem fer með æðsta vald í málefnum sambandsins milli þinga.
- c. fastanefndir HSÍ sem vinna samkvæmt lögum og reglugerðum HSÍ og starfsreglum sem stjórn HSÍ setur þeim.
- d. sérstakar nefndir sem skipaðar eru af handknattleiksþingi eða stjórn HSÍ og starfa að afmörkuðum málefnum.
- e. framkvæmdastjóri HSÍ sem ber ábyrgð á daglegum rekstri sambandsins og skrifstofu HSÍ sem sér um daglega umsýslu verkefna.

Dómstig HSÍ eru tvö, dómstóll HSÍ og áfrýjunardómstóll HSÍ, og skulu starfa samkvæmt lögum þessum.

## IV. kafli Handknattleiksþing

### 8. gr. Boðun

Handknattleiksþing skal haldið árlega eigi síðar en 1. maí. Stjórn HSÍ ákveður þingstað og skal boða það með rafrænum hætti með eins mánaðar fyrirvara. Handknattleiksþingið er lögmaett ef löglega er til þess boðað.

### 9. gr. Réttur til þingsetu

Handknattleiksþing sitja fulltrúar frá aðildarfélögum og sambandsaðilum HSÍ.

Fulltrúafjöldi aðildarfélaga miðast við fjölda iðkenda og meistaraflokksliða á vegum HSÍ þannig að:

1. fyrir færri en 100 iðkendur er einn fulltrúi
2. fyrir 100 til 200 iðkendur eru tveir fulltrúar
3. fyrir 200 til 300 iðkendur eru þrír fulltrúar



4. fyrir 300 iðkendur eða fleiri eru fjórir fulltrúar
5. fyrir að hafa lið í meistaraflokki sem tekur þátt í úrvalsdeild eða 1.deild fæst einn fulltrúi

Hvert héraðssamband á einn fulltrúa.

Hvert félag getur þó aldrei fengið fleiri en 4 fulltrúa.

Á handknattleiksþingi hafa aðeins þingfulltrúar atkvæðisrétt og eingöngu fulltrúar aðildarfélaga og sambandsaðila sem ekki eru í vanskilum við HSÍ.

Hver þingfulltrúi fer með eitt atkvæði. Allir þingfulltrúar skulu hafa kjörbréf, sem gefin eru út af aðildarfélögum eða sambandsaðilum á þar til gerðu eyðublaði sem HSÍ sér þeim fyrir. Skulu þau staðfest af kjörbréfanefnd. Ekki er unnt að greiða atkvæði samkvæmt umboði eða bréfleiðis.

Á handknattleiksþingi eiga auk kjörinna fulltrúa rétt til þingsetu og hafa málfrelsi og tillögurétt:

- a. stjórn HSÍ
- b. skoðunarmenn reikninga HSÍ
- c. framkvæmdastjórn ÍSÍ
- d. framkvæmdastjórar HSÍ og ÍSÍ
- e. fyrrverandi formenn HSÍ
- f. allir nefndarmenn fastanefnda HSÍ
- g. dómara dómstóls og áfrýjunardómstóls HSÍ
- h. fulltrúi menntamálaráðuneytisins
- i. stjórn HDSÍ
- j. auk þess getur stjórn HSÍ boðið öðrum aðilum þingsetu ef hún telur ástæðu til

## 10. gr. Málefni

Málefni sem aðildarfélög eða sambandsaðilar óska eftir að tekin verði fyrir á þinginu skulu tilkynnt stjórn HSÍ minnst 21 degi fyrir þingið og skal stjórnin senda öllum aðildarfélögum og sambandsaðilum þau málefni eigi síðar en 7 dögum fyrir þingsetningu ásamt dagskrá þingsins.

Eigi síðar en viku fyrir boðað handknattleiksþing skal stjórn HSÍ kynna aðildarfélögum og sambandsaðilum reikninga sambandsins ásamt fjárhagsáætlun fyrir næsta starfsár.

## 11. gr. Dagskrá

Störf handknattleikspings eru:

1. Þingsetning
2. kosning þingforseta og varaþingforseta
3. staðfesting lögmæti þingsins í samræmi við lög
4. kosning þingritara og varaþingritara



5. kosning þriggja manna í kjörbréfanefnd
6. þinggerð síðasta árs lögð fram
7. ávörp gesta
8. álit kjörbréfanefndar lagt fram og samþykkt
9. kosning þriggja manna í fjárhagsnefnd, laganefnd og allsherjarnefnd þingsins
10. lögð fram skýrsla fráfarandi stjórnar
11. gjaldkeri leggur fram reikninga HSÍ
12. umræður um skýrslu stjórnar og reikninga. Reikningar lagðir fram til samþykkis
13. stjórn HSÍ leggur fram fjárhagsáætlun HSÍ, þar með talið þátttökugjöld, fyrir næsta starfsár
14. tillögur um breytingar á lögum teknar til afgreiðslu
15. teknar til umræðu aðrar tillögur og önnur mál, sem hafa borist til stjórnar
16. álit þingnefnda og tillögur og atkvæðagreiðslur um þær
17. önnur mál
18. kosning stjórnar
19. kosning 2 skoðunarmanna og 2 til vara
20. kosning í dómstóls HSÍ, 3 aðaldómarar og 3 til vara, allir löglærðir
21. kosning í áfrýjunardómstól HSÍ, 3 aðaldómarar og 3 til vara, allir löglærðir
22. kosning fulltrúa á íþróttáþing ÍSÍ
23. þingslit

Stjórn HSÍ skal senda framkvæmdastjórn ÍSÍ, aðildarfélögum og sambandsaðilum HSÍ fundargerð ársþings og gildandi lög og reglugerðir sambandsins í síðasta lagi 1. ágúst ár hvert.

## **12. gr. Atkvæðagreiðsla**

Einfaldur meirihluti ræður úrslitum nema um lagabreytingar sé að ræða, þá þarf 2/3 hluta greiddra atkvæða. Þingið getur með 2/3 atkvæða viðstaddra fulltrúa leyft að taka fyrir mál sem komið er fram eftir að dagskrá þingsins var send aðildarfélögum og sambandsaðilum. Þó skal óheimilt að afgreiða tillögur um breytingar á lögum þessum sem lagðar eru fram eftir að handknattleiksþing er hafið, nema slíkt sé nauðsynlegt vegna annarra tillagna sem samþykktar hafa verið á þinginu eða fluttar sem breytingartillögur við aðrar tillögur sem liggja fyrir þinginu.

Þingfulltrúar á handknattleiksþingi greiða atkvæði um mál með handauppréttingu. Ef ¼ þingfulltrúa óska eftir skriflegri atkvæðagreiðslu skal þingforseti verða við ósk þeirra.

Ákvarðanir sem teknar eru á handknattleiksþingi skulu taka gildi strax nema annað sé ákveðið á þinginu.

## **13. gr. Aukaþing**

Aukaþing má halda ef nauðsyn krefur að mati stjórnar HSÍ eða helmingur aðildarfélaga og sambandsaðila óskar þess. Alla boðunar- og tilkynningafresti til aukaðings má hafa helmingi styttri en til reglulegs þings.



Fulltrúar á aukþingi eru þeir sömu og voru á næsta reglulegu þingi á undan og gilda sömu kjörbréf. Kjósa má nýjan fulltrúa í stað þess sem er forfallaður. Á aukþingi má ekki gera lagabreytingar og ekki kjósa stjórn, nema bráðabirgðastjórn fimm manna, ef meirihluti kjörinnar stjórnar hefur sagt af sér eða hætt störfum af öðrum orsökum, eða stjórnin að eigin dómi orðið óstarfhæf. Að öðru leyti gilda reglur um reglulegt handknattleiksþing.

## V. kafli Stjórn HSÍ

### 14. gr. Skipulag stjórnar HSÍ

Stjórn HSÍ skipa:

- a. formaður
- b. varaformaður
- c. meðstjórnandi/gjaldkeri
- d. formaður markaðs- og kynningarnefndar
- e. formaður dómarnefndar
- f. formaður fræðslu- og útbreiðslunefndar
- g. formaður landsliðsnefndar karla
- h. formaður landsliðsnefndar kvenna
- i. formaður mótanefndar

Varamenn í stjórn taka sæti í stjórninni ef aðalmaður forfallast og koma inn í stjórnina í sömu röð og þeir eru kosnir.

### 15. gr. Kosning stjórnar HSÍ

Stjórn HSÍ er kosin á handknattleiksþingi og hafa allir kjörnir þingfulltrúar atkvæðisrétt. Stjórnina skipa 9 menn.

Fyrst skal kjósa beinni kosningu formann til tveggja ára, næst skal kjósa 4 stjórnarmenn til tveggja ára. Þeir sem flest atkvæði fá teljast rétt kjörnir.

Næst skal kjósa 3 menn sem varamenn til eins árs. Þeir sem flest atkvæði fá teljast rétt kjörnir.

Tilkynning um framboð til embættis formanns og stjórnar HSÍ skal berast skrifstofu HSÍ minnst 21 degi fyrir þing. Uppstillingarnefnd er þó heimilt að samþykkja framboð sem fram kemur síðar.

Til þess að ná kjöri sem formaður HSÍ þarf meirihluta greiddra atkvæða. Náist ekki meirihluti við fyrstu kosningu skal kjósa á ný, bundinni kosningu, um þá tvo menn sem flest atkvæði hlutu. Ræður þá einfaldur meirihluti atkvæða.

Allar kosningar til formanns og stjórnar skulu vera skriflegar. Kosning skal vera bundin við þá sem gefa kost á sér og er atkvæði aðeins gilt ef kosnir eru jafnmargir og kjósa á. Við kosningu á milli annarra en formanns á handknattleiksþingi gildir sú regla að þeir



sem flest atkvæði fá eru rétt kjörnir að. Fáir fleiri en þeir sem kjósa á jafnmörg atkvæði skal kjósa um þá á ný, bundinni kosningu. Verði þeir enn jafnir ræður hlutkesti.

## **16. gr. Verkaskipting stjórnar HSÍ**

Formaður skal boða til stjórnarfundar og stjórna þeim. Stjórnarfundir skulu haldnir eigi sjaldnar en annan hvern mánuð.

Óski þrjár eða fleiri stjórnarmenn eftir stjórnarfundum skal til hans boðað eigi síðar en 7 dögum eftir að ósk þar að lútandi hefur verið borin fram.

Stjórn HSÍ skal skipta með sér verkum að öðru leyti en ákveðið er í lögum þessum. Á fyrsta stjórnarfundum skal stjórnin skipta með sér verkum. Stjórn HSÍ setur framkvæmdastjóra starfslýsingu.

Framkvæmdastjóri HSÍ fer með prókúru en allar meiriháttar skuldbindingar af hálfu HSÍ skulu samþykktar af meirihluta stjórnar.

## **17. gr. Starfssvið stjórnar HSÍ**

Starfssvið stjórnar HSÍ er:

- a. að sjá til þess að ákvörðunum og ályktunum handknattleiksþings sé framfylgt og að lög og reglugerðir HSÍ séu haldnar
- b. að setja nauðsynlegar reglur og reglugerðir um handknattleik á Íslandi í samræmi við lög þessi
- c. að bera ábyrgð á fjármálum HSÍ
- d. að ráða framkvæmdastjóra til starfa samkvæmt starfslýsingu
- e. að vinna að eflingu handknattleiks í landinu
- f. að skera úr ágreiningi eða taka ákvarðanir um handknattleiksmál, sem lög þessi og/eða reglugerðir HSÍ ná ekki yfir
- g. að annast útgáfu á lögum þessum og reglugerðum fyrir handknattleik, sem jafnan séu í samræmi við alþjóðareglur
- h. að ráða landsliðsþjálfara til starfa
- i. að semja um og taka ákvörðun um þátttöku íslenskra landsliða í keppnum erlendis og koma fram erlendis fyrir hönd íslensks handknattleiks
- j. að staðfesta ákvarðanir heiðursmerkjanefndar um veitingu heiðursmerkja og viðurkenninga
- k. að tilnefna menn til starfa á vegum alþjóðasamtaka m.a. eftir tilnefningu fastanefnda
- l. að skipa menn í nefndir HSÍ
- m. að velja handknattleiksmenn ársins
- n. að skipuleggja daglegan rekstur sambandsins
- o. að senda framkvæmdastjórn HSÍ lögboðnar skýrslur
- p. að hafa yfirstjórn með landsmótum
- q. að raða niður og ákveða stað og tíma fyrir alþjóðamótum sem haldin eru á Íslandi og hafa samráð við framkvæmdastjórn HSÍ um ákvörðun á landsmótum og alþjóðamótum sem haldin eru hérlendis



- r. að vinna að fjáröflun til að standa undir kostnaði af rekstri sambandsins
- s. að skipa uppstillingarnefnd fyrir ársþing HSÍ sé þess þörf
- t. að standa fyrir formannafundum

Stjórn HSÍ lítur eftir því að lög HSÍ, reglugerðir HSÍ og leikreglur séu haldnar og getur hún vísað brotum aðila til aganefndar HSÍ til úrskurðar. Í sérstökum tilfellum þegar lög þessi eða reglugerðir HSÍ eru ekki fullnægjandi getur hún tekið til skoðunar sjálfstætt brot aðila og hefur heimild til að beita viðurlögum vegna brota á lögum þessum, reglugerðum og leikreglum. Viðurlögin geta verið leikbönn, tímabundið bann, áminning, ávítur og sektir.

Stjórn HSÍ og allir þeir sem koma fram á vegum HSÍ skulu fara eftir þeim lögum, siðareglum og reglugerðum sem gilda á hverjum tíma.

Stjórn HSÍ, fastanefndir HSÍ, dómstólar HSÍ og starfsmenn hafa frjálstan aðgang að öllum handknattleiksmótum og sýningum sem fram fara innan vébanda HSÍ.

Stjórn HSÍ og framkvæmdastjóri hefur rétt til að sitja aðalfundi sérráða, HDSÍ og héraðssambanda sem eru aðilar að sambandinu.

Stjórn HSÍ skal setja á heimasíðu HSÍ endurrit allra fundargerða stjórnarinnar eða útdrátt úr þeim.

## **18. gr. Reglugerðir**

Stjórn HSÍ setur nauðsynlegar reglugerðir um þau málefni sem snúa að allri framkvæmd laga þessara. Nær það til allra breytinga á gildandi reglugerðum sem og setningu nýrra reglugerða.

Nýjar reglugerðir og breytingar á gildandi reglugerðum skulu kynntar aðildarfélögum með rafrænum hætti og taka þær gildi samkvæmt nánari ákvörðun stjórnar HSÍ. Ekki þarf að birta þær með sérstökum hætti svo þær öðlist gildi heldur er nægjanlegt að þær séu kynntar með rafrænum hætti og á heimasíðu HSÍ.

Óski aðildarfélög eftir setningu nýrra reglugerða eða breytinga á gildandi reglugerðum skal slíkum óskum beint til stjórnar HSÍ.

## **VI. kafli Nefndir HSÍ**

### **19. gr. Fastanefndir**

Stjórn HSÍ skal að loknu handknattleiksþingi skipa eftirtaldar fastanefndir:

- a. aganefnd
- b. búninganefnd
- c. deildarnefnd
- d. dómaranefnd
- e. fræðslu- og útbreiðslunefnd





- f. heiðursmerkjanefnd
- g. laganefnd
- h. landsliðsnefnd karla
- i. landsliðsnefnd kvenna
- j. læknanefnd
- k. mótanefnd
- l. móttökunefnd
- m. markaðs- og kynningarnefnd

Fastanefndir starfa í umboði stjórnar HSÍ samkvæmt lögum, siðareglum og reglugerðum sambandsins. Stjórn HSÍ skal setja fastanefndum nauðsynlegar starfsreglur. Fastanefndir hafa ekki sérstakan fjárhag.

Handknattleiksþing HSÍ getur skipað sérstakar tímabundnar nefndir sem starfa á milli handknattleiksþinga til að fjalla um málefni sem nánar eru ákvörðuð á þinginu.

Stjórn HSÍ getur skipað sérstakar nefndir til að fjalla um afmörkuð verkefni.

## **20. gr. Aganefnd**

Aganefnd HSÍ skal skipuð 3 mönnum og jafnmörgum til vara. Skal a.m.k. einn aðalmaður vera löglærður og skal varamaður hans einnig vera löglærður.

Nefndin úrskurðar um viðurlög samkvæmt lögum þessum, reglugerðum HSÍ og starfsreglum aganefndar gegn aðildarfélögum, forráðamönnum, leikmönnum, þjálfurum, starfsmönnum, umboðsmönnum, áhorfendum og öðrum þeim sem eru innan vébanda aðildarfélaga HSÍ.

Aganefnd skal úrskurða um þau atriði sem fram koma í atvikaskýrslum dómara og/eða eftirlitsmanna í leikjum á Íslandsmóti, í bikarkeppni, deildarbikarkeppni og meistarakeppni. Nefndin fjallar um brot leikmanna, þjálfara, forystumanna félaga, félaga og áhorfenda. Þá fjallar nefndin um önnur mál sem berast henni og/eða hún telur ástæðu til að hafa afskipti af vegna leikja sem fara fram á Íslandi, enda fjalli ekki aðrir um þau.

Aganefnd skal tilkynna úrskurð sinn strax að loknum fundi, með rafrænum hætti eða öðrum sannanlegum hætti, til formanns handknattleiksdeildar viðkomandi félags eða þess aðila sem félagið hefur bent HSÍ á. Úrskurður aganefndar skal einnig birtur á heimasíðu HSÍ strax að loknum fundi.

Heimilt er að skjóta til dómsstóls HSÍ úrskurðum aganefndar sem kveða á um það að leikmaður, þjálfari, starfsmaður liðs eða félag skuli sæta tímabundnu banni eða sektum að hærri fjárhæð en kr. 100.000 eða ef úrskurður felur í sér endurtekt á leik eða breytingum á úrslitum leikja. Í tilvikum sem þessum skal öllum aðilum máls kynnt úrskurður aganefndar.

Að öðru leyti en í 5.mgr. kveður á um eru úrskurðir aganefndar endanlegir.



Aganefnd hefur heimild til að beita viðurlögum vegna brota á lögum þessum, reglugerðum og leikreglum. Viðurlögin geta verið leikbönn, tímabundið bann, áminning, svipting réttar til þess að gegna starfi innan handknattleikshreyfingarinnar, ávítur og sektir.

Stjórn HSÍ skal setja reglugerð um viðurlög við einstökum brotum á lögum þessum, reglugerðum og leikreglum í samræmi við 7.mgr.

### **21. gr. Búninganefnd**

Búninganefnd HSÍ skal sjá um alla búninga HSÍ þ.e. keppnisbúnað, æfingabúnað og annan fatnað á vegum HSÍ svo og allar rekstrarvörur landsliða.

### **22. gr. Deildanefnd**

Deildanefnd HSÍ skal vera stjórn HSÍ til ráðgjafar um öll þau mál sem tengjast deildarkeppnum meistaraflokka á vegum HSÍ svo sem markaðsmál, styrktaraðila og útbreiðslu.

### **23. gr. Dómaranefnd**

Dómaranefnd hefur umsjón með dómaramálum HSÍ, ber ábyrgð á flokkun og vali dómara og eftirlitsmanna á leiki á vegum sambandsins og sér um fræðslumál dómara. Nefndin annast útgáfu handknattleiksreglnanna á íslensku og sér um að dómarar framfylgi þeim. Dómaranefnd skal að jafnaði vera skipuð reynslumiklum fyrrverandi dómurum.

### **24. gr. Fræðslu- og útbreiðslunefnd**

Fræðslu- og útbreiðslunefnd hefur umsjón með og skipuleggur fræðslumál HSÍ og annast sér í lagi menntun handknattleiksþjálfara og leiðtoga. Nefndin skal einnig vera vettvangur nýrra hugmynda og þróunar í íslenskum handknattleik.

Nefndin vinnur að eflingu handknattleiks og útbreiðslu með það að markmiði að sem flestir fái tækifæri til að taka þátt í leik og starfi innan vébanda handknattleikssambandsins.

### **25. gr. Heiðursmerkjanefnd**

Heiðursmerkjanefnd kemur með tillögur til stjórnar HSÍ um veitingu heiðursmerkja á vegum HSÍ. Nefndin skal sjá um að halda skrá yfir viðurkenningar á vegum HSÍ og skal hún birt á heimasíðu sambandsins.

### **26. gr. Laganefnd**



Laganefnd er stjórn HSÍ til ráðgjafar um lög og reglugerðir sambandsins. Nefndin skal fara yfir allar tillögur sem berast fyrir handknattleiksping og metur hvort þær séu rétt fram settar og uppfylli kröfur til þinglegrar afgreiðslu.

Nefndin skal fara yfir allar tillögur stjórnar HSÍ að reglugerðum áður en þær eru afgreiddar frá stjórn HSÍ til að meta hvort þær séu rétt fram settar og uppfylli lagaákvæði þessi.

### **27. gr. Landsliðsnefndir karla og kvenna**

Landsliðsnefndir hafa umsjón með tilteknu landsliði eða landsliðum. Nefndirnar hafa umsjón með þátttöku viðkomandi liða í alþjóðakeppni, skipuleggja undirbúning þeirra og annast samskipti við starfsmenn liðanna.

### **28. gr. Læknanefnd**

Læknanefnd skal skipuleggja og tryggja starfsemi fagteymis HSÍ svo sem lækna og sjúkraþjálfara með landsliðum HSÍ.

Læknanefnd skal sjá um skipulagningu og hafa umsjón með lækningum, sjúkraþjálfun og fylgist með lyfjaprófum á alþjóðlegum mótum og leikjum sem fram fara á Íslandi.

### **29. gr. Mótanefnd**

Mótanefnd annast yfirstjórn mótamála HSÍ þar með talið skipulag landsmóta, niðurröðun þeirra og eftirlit með framkvæmd þeirra.

### **30. gr. Móttökunefnd**

Móttökunefnd skipuleggur, í samvinnu við skrifstofu HSÍ, allar heimsóknir erlendra liða á vegum HSÍ til Íslands.

### **31. gr. Markaðs- og kynningarnefnd**

Markaðs- og kynningarnefnd skal hafa umsjón með markaðs- og kynningarmálum HSÍ.

## **VII. kafli Dómstólar HSÍ**

### **31. gr. Dómstigin.**

Dómstólar HSÍ eru dómstóll HSÍ og áfrýjunardómstóll HSÍ. Þeir skulu hafa fullnaðarlögsögu yfir þeim málefnum sem koma upp innan vébanda HSÍ og varða lög og reglur HSÍ eftir því sem við á, en á þessum lögum og reglum skulu dómstólar HSÍ byggja niðurstöður sínar. Dómstólar HSÍ skulu lúta ákvæðum laga þessara og skulu öll



ágreiningsmál er varða handknattleik rekin fyrir dómstólum HSÍ. Lög Íþróttá- og Ólympíusambands Íslands um dómstólaskipan skulu þó vera þessum reglum til fyllingar eftir því sem við getur átt.

Dómstóll HSÍ er fyrsta dómstig í málum sem upp koma innan handknattleikshreyfingarinnar.

Áfrýjunardómstóll HSÍ er æðsti dómstóll innan handknattleikshreyfingarinnar.

Dómstólar HSÍ skulu hafa aðsetur á skrifstofu HSÍ og er tölvupóstfang dómstólanna hsi@hsi.is. HSÍ ber að tilkynna án tafar allar breytingar sem verða á dómstólaskipan innan sambandsins, en skrá sú sem haldin er á skrifstofu HSÍ telst alltaf lögfull sönnun á því hvar eigi að reka mál.

### **32. gr. Skipan dómstóls HSÍ**

Dómarar dómstóls HSÍ skulu vera 3 og 3 til vara, allir löglærðir.

Dómarar skulu kosnir á reglulegu handknattleiksþingi HSÍ til setu fram að næsta reglulega handknattleiksþingi HSÍ.

Á fyrsta dómarafundi eftir reglulegt handknattleiksþing HSÍ skulu dómarar koma saman og kjósa dómsformann og varaformann.

Einn dómari skal fara með mál og ákveður dómsformaður hver af hinum reglulegu dómurum skuli fara með málið.

Nú telur dómari þörf á meðdómurum og er honum þá heimilt, í samráði við formann dómsins, að kalla til tvo meðdómara í dóminn. Meðdómarar þurfa ekki að vera löglærðir.

### **33. gr. Kæruréttur/málskotsréttur.**

Rétt til kæru/málsskots hefur hver sá einstaklingur og það félag sem misgert er við og hagsmuni hefur af niðurstöðu máls.

### **34. gr. Meðalganga og upplýsingagjöf.**

Aðila sem hefur kærurétt samkvæmt 33. grein er heimilt að beina þeirri kröfu til dómsins að hann verði aðili málsins. Krafa þessi þarf að koma fram svo fljótt sem verða má og eigi síðar en við aðalflutning málsins

### **35. gr. Kærufrestur og þingfestingargjald.**

Kærufrestur til dómstóls HSÍ er 24 tímar frá því að hið kærða atvik átti sér stað.



Frestur til að skjóta úrskurði aganefndar til dómstóls HSÍ er 24 tímar frá birtingu úrskurðarins.

Sé máli vísað frá dómi með úrskurði hefur kærandi 24 tíma frest frá birtingu úrskurðarins til að skjóta málinu aftur fyrir dómstólinn.

Þingfestingargjald er kr. 25.000,- og skal greiðast inná reikning HSÍ. Greiðslukvittun þingfestingargjalds skal fylgja kæru til dómsins.

Verði niðurstaða dómstóls kæranda í vil fær hann þingfestingargjaldið endurgreitt.

### **36. gr. Form og efni kæru.**

Kæra skal vera skrifleg og skulu eftirfarandi upplýsingar koma fram í kæru:

1. nafn, kennitala, heimilisfang, símanúmer og tölvupóstfang kæranda
2. nafn kærða, kennitala, heimilisfang, símanúmer og tölvupóstfang
3. nafn fyrirsvarsmanns kæranda, heimilisfang hans, símanúmer og tölvupóstfang
4. greinargóð lýsing á því hvaða kröfur eru gerðar í málinu
5. lýsing helstu málavaxta
6. tilvísun til þeirra lagareglna sem við eiga
7. lýsing á helstu röksemdum aðila málsins
8. lýsing á þeim gögnum sem kærandi byggir mál sitt á ásamt ljósriti af þeim gögnum
9. upptalning á þeim vitnum sem kærandi mun kalla til skýrslutöku

Kæra, ásamt fylgigögnum og greiðslukvittun þingfestingargjalds, skal send dómnum með sannarlegum hætti. Heimilt er að senda kæru til dómsins með tölvupósti.

### **37. gr. Málsmeðferð.**

Mál telst þingfest með því að kæra berst á skrifstofu HSÍ ásamt kvittun fyrir greiðslu þingfestingargjalds. Kærandi á rétt á því að fá kvittun fyrir móttöku kærunnar.

Formaður dómsins skal, svo fljótt sem hægt er, taka afstöðu til þess hvort kærufrestur samkvæmt 35. grein sé liðinn eða einhverjir formgallar samkvæmt 36. grein geri að verkum að málið sé ekki tækt til meðferðar. Séu slíkir gallar á málinu skal dómsformaður vísa málinu frá dómi með úrskurði.

Telji dómsformaður að uppfyllt séu skilyrði 36. greinar skal hann eins fljótt og hægt er, þó eigi síðar en innan tveggja virka daga frá þingfestingu, ákveða hvaða dómari skuli fara með málið.

Sé dómsformaður forfallaður skal varaformaður annast þau verkefni sem til falla.

Dómari sem fær mál til meðferðar skal án tafar senda kærða/varnaraðila áskorun um að halda uppi vörnum í málinu ásamt afriti af kærinni. Áskorunina skal senda með rafrænum hætti eða á annan sannanlegan hátt. Almennt skal frestur til að skila



greinargerð ekki vera lengri en 3 sólarhringar. Greinargerð varnaraðila skal uppfylla þau skilyrði er koma fram í 36. grein eftir því sem við getur átt.

Dómari getur óskað eftir skriflegum athugasemdum frá stjórn HSÍ og framkvæmdarstjóra þess eða öðrum þeim sem málið varðar.

Þegar dómari hefur mótttekið greinargerð varnaraðila skal hann boða til þinghalds og ákveða framhald málsins þ.m.t. hvort það skal flutt munnlega eða skriflega og hvort taka skuli vitna- eða aðilaskýrslur fyrir dómi. Ef mál er ekki munnlega flutt skal aðilum gefinn stuttur frestur til að skila skriflegum athugasemdum.

Dómari skal leitast við að hraða störfum sínum eins og kostur er og skal dómur að jafnaði kveðinn upp innan viku frá því að mál var dómtekið.

Birta skal aðilum dóm eða úrskurð með rafrænum hætti eða á annan sannanlegan hátt ef þeir eru ekki viðstaddir dómsuppsögu og skal þá jafnframt greint frá heimild aðila til áfrýjunar og áfrýjunarfresti.

### **38. gr. Flýtimeðferð máls.**

Telji formaður dómsins augljóst, við skoðun á kæru sem honum berst, að brotið hafi verið gegn lögum og reglum handknattleikshreyfingarinnar er honum heimilt að beina þeirri kröfu til gagnaðila að hann upplýsi innan sólarhrings hvort hann hyggst hafa varnir uppi í málinu og hverjar þær varnir séu. Komi í ljós að engar varnir verða hafðar uppi í málinu eða ef framkomnar varnir eru bersýnilega tilgangslausar er honum heimilt að úrskurða eða dæma kæranda í hag.

### **39. gr. Tilnefning talsmanns fyrir dómi.**

Telji dómurinn að hætta sé á að málsstaður annars málsaðila verði fyrir tjóni vegna þess að hann er ekki fær um að koma sínum sjónarmiðum að í málinu getur formaður dómsins upplýst framkvæmdastjóra HSÍ um slíkt. Framkvæmdastjóri HSÍ skal þá skipa aðila til að gæta hagsmuna viðkomandi í málinu.

### **40. gr. Skipan áfrýjunardómstóls HSÍ**

Áfrýjunardómstóll HSÍ skal skipaður 3 löglærðum dómurum og 3 löglærðum til vara.

Dómarar skulu kosnir á reglulegu handknattleiksþingi HSÍ til setu fram að næsta reglulega handknattleiksþingi.

Dómstóllinn kys sér forseta.

### **41. gr. Áfrýjun og áfrýjunargjald.**

Heimilt er að skjóta til áfrýjunardómstóls HSÍ dómum og úrskurðum dómstóls HSÍ.



Frestur til að áfrýja máli til áfrýjunardómstólsins skal vera 3 sólarhringar frá birtingu dóms hafi málsaðilar ekki verið viðstaddir uppkvaðningu dóms eða úrskurðar dómstóls HSÍ.

Sá sem hyggst áfrýja máli skal senda áfrýjunardómstólnum sérstaka greinargerð þar sem lýst er þeim sjónarmiðum sem áfrýjandi byggir á ásamt gögnum málsins.

Áfrýjunargjald er kr. 25.000,- og skal greiðast inná reikning HSÍ. Greiðslukvittun áfrýjunargjalds skal fylgja greinargerð til dómsins.

Verði niðurstaða áfrýjunardómstóls kæranda í vil fær hann áfrýjunargjaldið endurgreitt.

#### **42. gr. Ný gögn og málsmeðferðarreglur.**

Ný gögn skulu ekki lögð fram fyrir áfrýjunardómstólinn. Vitna- og aðilaskýrslur skulu ekki fara fram.

Dómstólnum er heimilt að víkja frá ákvæði 1. mgr. þegar sérstaklega stendur á.

Málsmeðferðarreglur laga þessara skulu gilda um áfrýjunardómstól HSÍ eftir því sem við á.

#### **43. gr. Vanhæfi dómara.**

Dómari er vanhæfur til að fara með mál ef:

- a. hann er aðili að málinu eða fyrirsvarsmaður aðila
- b. hann hefur gætt réttar aðila varðandi sakarefnið eða veitt aðila leiðbeiningar um það umfram skyldu sem dómara hafa
- c. hann hefur borið eða verið kvaddur til að bera vitni um atvik málsins af réttmætu tilefni eða verið mats- eða skoðunarmaður um sakarefnið
- d. hann er eða hefur verið maki aðila, skyldur eða mægður aðila í beinan legg eða tengdur aðila með sama hætti vegna ættleiðingar
- e. hann tengist eða hefur tengst fyrirsvarsmanni eða málflytjanda með þeim hætti er segir í d-lið
- f. hann tengist eða hefur tengst vitni í málinu með sama hætti og segir í d-lið
- g. fyrir eru hendi önnur atvik eða aðstæður sem eru fallnar til þess að draga óhlutdrægni hans með réttu í efa m.a. ef dómari eða náin skyldmenni eru félagsbundin aðila máls.

Stjórn HSÍ skal skipa dómara í dómstóla HSÍ til meðferðar einstaks máls ef tilskilinn fjöldi næst ekki úr kjörnum dómurum og varadómurum vegna vanhæfis þeirra.

#### **44. gr. Lögsaga.**

Undir dómstóla HSÍ heyra öll brot á lögum og reglum HSÍ.



#### **45. gr. Dómsniðurstöður.**

Dómstólar HSÍ geta í dómsorði, auk efnisniðurstöðu m.a. kveðið á um eftirfarandi réttindi og skyldur til aðila málsins:

1. dæmt leiki ógilda, látið endurtaka þá eða dæmt um úrslit þeirra
2. ákvarðað dagsektir gagnvart aðildarfélögum. Dagsektir renni til HSÍ
3. ákveðið sektir á aðildarfélög
4. málskostnað ef málsgrundvöllur telst vera tilefnislaus

Þær refsingar sem dómstólar HSÍ geta beitt eru:

1. áminning
2. vítur
3. svipting réttar til að gegna trúnaðarstörfum innan handknattleikshreyfingarinnar
4. óhlutgengisúrskurður sem veldur útilokun frá þátttöku í keppni innan handknattleikshreyfingarinnar um stundarsakir eða ævilangt
5. aðrar refsingar er lög eða reglur HSÍ tiltaka

Niðurstöður dómstóla HSÍ sem fela í sér óhlutgengisúrskurð skal skotið til dómstóls ÍSÍ í samræmi við 38. gr. laga ÍSÍ.

#### **46. gr. Þingbækur/dómabækur.**

Við dómstóla HSÍ skulu vera haldnar sérstakar þingbækur. Við fyrirtöku máls skal rita skýrslu í þingbók um það sem fram fer, hvaða gögn eru lögð fram, hverjir mæta í máli og hvað er afráðið um rekstur máls. Í þingbók skal jafnframt færa þær ákvarðanir sem teknar eru í málinu. Efni þingbókar skal að jafnaði ekki birt öðrum en málsaðilum.

Við dómstóla HSÍ skal haldin sérstök dómabók sem hefur að geyma uppkveðna dóma og úrskurði. Dómabók skal vera aðgengileg og afrit hennar birt á heimasíðu HSÍ.

#### **47. gr. Lyfjaeftirlit.**

Mál vegna meintrar lyfjamisnotkunar íþróttamanna skal farið með samkvæmt lögum ÍSÍ um lyfjamál.

#### **48. gr. Niðurfelling refsingar.**

Handknattleiksþing HSÍ er heimilt með minnst 2/3 greiddra atkvæða að fella niður refsingu eða veita dæmdum aðila full réttindi að nýju innan handknattleikshreyfingarinnar.

### **VIII. kafli FRAMKVÆMDASTJÓRI OG SKRIFSTOFA**

#### **49. gr. Framkvæmdastjóri HSÍ**





Framkvæmdastjóri HSÍ er ráðinn af stjórn handknattleikssambandsins samkvæmt ráðningarsamningi.

Framkvæmdastjóri HSÍ stjórnar og ber ábyrgð á rekstri skrifstofu og starfsmannahaldi HSÍ.

Framkvæmdastjóri HSÍ getur vísað brotum aðila á lögum HSÍ, siðareglum HSÍ, reglugerðum HSÍ og leikreglum til aganefndar HSÍ til úrskurðar.

## **50. gr. Skrifstofa HSÍ**

Skrifstofa annast daglega umsýslu verkefna HSÍ undir stjórn og ábyrgð framkvæmdastjóra.

## **IX. kafli Mótafyrirkomulag**

### **51. gr. Handknattleiksmót**

#### **A. Deildaskipting**

Deildaskipting skal vera eftirfarandi í meistaraflokki karla og kvenna:

- a) 9 lið eða færri, ein deild, 3 umferðir.
- b) 10-14 lið, ein deild, 2 umferðir.
- c) 15-24 lið, tvær deildir. Stjórn HSÍ ákveður fjölda í deild og fjölda umferða að fenginni tillögu mótanefndar ár hvert og skal tilkynna um ákvörðun sína til aðildarféлага eigi síðar en í júní.
- d) 25 lið eða fleiri, þrjár deildir. Stjórn HSÍ ákveður fjölda í deild og fjölda umferða að fenginni tillögu mótanefndar ár hvert og skal tilkynna um ákvörðun sína til aðildarféлага eigi síðar en í júní.

Ef stjórn HSÍ ákveður að fjölga eða fækka í úrvalsdeild skal sú ákvörðun vera tekin eigi síðar en í júní og taka gildi ári síðar. Ákvörðun þessi getur verið bundið skilyrðum, skal vera rökstudd og skal lögð fyrir næsta ársþing HSÍ til samþykktar.

Stjórn HSÍ ákveður, að fenginni tillögu mótanefndar ár hvert, með hvaða hætti raðað verður í leikjaumferðir í deildum.

Það lið sem vinnur úrvalsdeildina er deildarmeistari úrvalsdeildar og það lið sem vinnur aðrar deildir er deildarmeistari viðkomandi deildar.

Ef lið eru 10 lið eða fleiri í úrvalsdeild skulu 2 neðstu liðin falla og efsta liðið í 1. deild ásamt sigurvegaram umspili liðanna í 2. -5. sæti 1. deildar, taka sæti þeirra.

Ef liðin í úrvalsdeild eru 8 þá skal neðsta liðið falla beint og það lið sem lendir í næst neðsta sæti í úrvalsdeild leika umspil við liðin í 2.-4. sæti 1. deildar um það hvaða lið fær sæti í úrvalsdeild að ári ásamt efsta liði 1. deildar.



Stjórn HSÍ setur reglur um færslu liða milli 1. og 2. deildar.

### **B. Úrslitakeppnir úrvalsdeilda**

#### a) 8 liða úrvalsdeild

Leikin skal úrslitakeppni 6 efstu liða.

Lið 1 og 2 sitja hjá í 6 liða úrslitum

Lið 3 mætir liði 6

Lið 4 mætir liði 5

Þau lið sem fyrst vinna 2 leiki leika í undanúrslitum.

Sigurvegari viðureignar 3/6 mætir liði 2

Sigurvegari viðureignar 4/5 mætir liði 1.

Þau lið sem fyrst vinna 3 leiki leika til úrslita um Íslandsmeistaratitilinn. Það lið sem vinnur 3 leiki í þeirri viðureign verður Íslandsmeistari.

Liðið sem var ofar í deildarkeppninni fær ávallt fyrsta leik og oddaleik á heimavelli.

#### b) 9-14 liða úrvalsdeild

Leikin skal úrslitakeppni 8 efstu liða.

Lið 1 mætir liði 8

Lið 2 mætir liði 7

Lið 3 mætir liði 6

Lið 4 mætir liði 5

Þau lið sem fyrst vinna 2 leiki leika í undanúrslitum.

Sigurvegari viðureignar 1/8 mætir 4/5

Sigurvegari viðureignar 2/7 mætir 3/6.

Þau lið sem fyrst vinna 3 leiki leika til úrslita um Íslandsmeistaratitilinn. Það lið sem vinnur 3 leiki í þeirri viðureign verður Íslandsmeistari.

Liðið sem var ofar í deildarkeppninni fær ávallt fyrsta leik og oddaleik á heimavelli.

### **C. Umspil 1.deildar**

#### a) 8 liða úrvalsdeild

Liðið í næst neðsta sæti úrvalsdeildar mætir liði 4 í 1. deild.

Lið 2 í 1. deild mætir liði 3 í 1. deild.

Þau lið sem fyrst vinna 2 leiki leika til úrslita um laust sæti í úrvalsdeild.



Það lið sem fyrst vinnur 3 leiki í þeirri viðureign fær sæti í úrvalsdeild á næsta keppnistímabili.

Liðið sem var ofar í deildarkeppninni fær ávallt fyrsta leik og oddaleik á heimavelli.

b) 10-12 liða úrvalsdeild

Lið 2 í 1.deild mætir liði 5 í 1. Deild.

Lið 3 í 1. deild mætir liði 4 í 1. Deild.

Þau lið sem fyrst vinna 2 leiki leika til úrslita um laust sæti í úrvalsdeild.

Það lið sem fyrst vinnur 3 leiki í þeirri viðureign fær sæti í úrvalsdeild á næsta keppnistímabili.

Liðið sem var ofar í deildarkeppninni fær ávallt fyrsta leik og oddaleik á heimavelli.

Ef ekki næst fullur liðafjöldi til þátttöku í umspili í 1.deild skal efsta lið umspils sitja hjá í 4 liða úrslitum.

***D. Fjölgun í úrvalsdeild***

a) Ef fjölga á úr 8 liðum í 10 í úrvalsdeild skulu liðin fá laus sæti eftir þessari röð:

1. Lið sem tapar úrslitum umspils 1. deildar
2. Liðið í 7. sæti úrvalsdeildar,
3. Efsta lið 1. deildar sem hefur ekki unnið sér sæti í úrvalsdeild.

b) Ef fjölga á úr 10 liðum í 12 í úrvalsdeild skulu liðin fá laus sæti eftir þessari röð:

1. Lið sem tapar úrslitum umspils,
2. Liðið í 9. sæti úrvalsdeildar,
3. Efsta lið 1. deildar sem hefur ekki unnið sér sæti í úrvalsdeild.

c) Ef fjölga á úr 8 liðum í 12 í úrvalsdeild skulu liðin fá laus sæti eftir þessari röð.

1. Lið sem tapar úrslitum umspils
2. Liðið í 8. sæti úrvalsdeildar
3. Liðin sem töpuðu undanúrslitum umspils.

***E. Fækkun í úrvalsdeild***

Ef fækka þarf liðum í úrvalsdeild skal sú fækkun fara fram ári síðar svo framarlega sem liðafjöldi í 1. deild er 6 lið eða fleiri. Ef liðafjöldi í 1. deild er færri en 6 lið skal leika í einni deild þegar í stað.

Stjórn HSÍ skal setja nánari reglur um fækkunina ef sú staða kemur upp.



### **F. Höfnun á þátttökurétt í úrvalsdeild**

Dragi lið sig úr úrvalsdeild eða hafni lið því að taka sæti í úrvalsdeild skulu lið fá það sæti í þessari röð.

1. Lið sem tapar úrslitum umspils
2. Lið sem féll úr úrvalsdeild í efra sæti
3. Lið sem féll úr úrvalsdeild í neðra sæti
4. Efsta lið 1. deildar sem hefur ekki unnið sér sæti í úrvalsdeild.

Hafi lið unnið sér rétt til að taka sæti í úrvalsdeild en hafnar því skal það sæta sektum.

### **G. Almenn ákvæði**

Við deildarskiptingu skal miða við þau lið sem hafa tilkynnt með fullnægjandi hætti þátttöku til skrifstofu HSÍ innan tilskilins frests skv. reglugerð HSÍ um handknattleiksmót.

Félögum er heimilt að senda til keppni í meistaraflokki ungmennalið svo framarlega sem þau leika ekki í sömu deild. Ungmennalið hjá félagi getur aldrei unnið sér inn keppnisrétt í úrvalsdeild og skal ekki vera með forgang við skipun í deildir gagnvart aðalliðum annarra félaga.

Öll handknattleiksmót og handknattleikir skulu fara fram samkvæmt lögum þessum og reglugerð HSÍ um handknattleiksmót. Leitast skal við að þau séu í samræmi við móta- og keppendareglur ÍSÍ.

### **52. gr. Þátttökuleyfi**

Til að öðlast rétt á þátttöku í úrvalsdeild og 1. deild Íslandsmótsins í meistaraflokki karla og kvenna skulu sækja um þátttökuleyfi árlega.

Til þess að fá þátttökuleyfi skulu félögin uppfylla tilteknar kröfur HSÍ varðandi skipulag, aðstöðu og fjármál.

### **53. gr. Félagaskipti**

Leikmönnum sem leika með meistaraflokki skal heimilt að ganga í lið hér á landi á tímabilinu frá 1. júní til 1. nóvember ár hvert og einnig frá 7. janúar til 1. febrúar ár hvert. Það sama skal gilda um leikmenn eldri en 17 ára sem ekki leika með meistaraflokki.

Leikmönnum 17 ára og yngri er heimilt að skipta um félag á tímabilinu 1. júní til 1. febrúar ár hvert.

Tímabundin félagaskipti er heimil á tímabilinu 1. júní til 1. febrúar ár hvert.



Félagi er heimilt fyrir 1. mars ár hvert að stytta tímabundin félagaskipti leikmanna sinna einhliða, svo framarlega sem lágmarkstíma sé náð. Nýti samningsfélag sér þessa heimild skal það gert með tilkynningu um félagaskipti. Leikmaður fær keppnisleyfi með samningsfélagi sínu að nýju 4 dögum eftir að tilkynningin er sannanlega móttækin af HSÍ.

Lágmarkstími tímabundinna félagaskipta er 1 mánuður og hámarkstími tímabundinna félagaskipta skal vera eitt keppnistímabil.

Félög, sem gera með sér sérstakt samkomulag um samnýtingu leikmanna, venstasamning, hafa heimild til að hafa félagaskipti sín á milli á tímabilinu 1. júní til 1. mars ár hvert. Lágmarkstími tímabundinna félagaskipta venstafélaga er 10 dagar og fær leikmaður keppnisleyfi með samningsfélagi sínu að nýju degi eftir tilkynning er sannanlega móttækin af HSÍ, nýti félag heimild til að stytta tímabundin félagaskipti leikmanns síns.

Undanþágur þessar um heimildir leikmanna til að leika með fleiri en einu liði, á grundvelli venstasamnings félaga, eru settar í þeim tilgangi að auka leiktíma yngri leikmanna almennt. Verði félag uppvíst um misnotkun á reglum þessum er stjórn HSÍ heimilt að sekta viðkomandi félag og/eða afturkalla undanþágur og heimildir félags skv. þessum reglum.

Stjórn HSÍ er í algerum undantekningartilfellum, sem varða persónulega velferð leikmanns, heimilt að samþykkja félagsskipti utan þessa tímabila. Beiðnir af þessum toga skulu ítarlega rökstuddar.

## **X. kafli REIKNINGAR**

### **54. gr. Reikningsárið**

Reikningsár HSÍ er frá 1. janúar til 31. desember. Milliuppgjör skal liggja fyrir 31. ágúst.

Reikningar HSÍ skulu undirritaðir af formanni, gjaldkera og framkvæmdastjóra.

Skoðunarmenn HSÍ skulu vera sjálfstæðir og óháðir HSÍ.

Reikningar HSÍ skulu áritaðir af kjörnum skoðunarmönnum.

## **XI. kafli ÝMIS ÁKVÆÐI**

### **55. gr. Réttindi**

HSÍ og aðildarfélag innan HSÍ eru eigendur alls réttar sem tengist mótahaldi HSÍ og/eða öðrum viðburðum skipulögðum af HSÍ. Þessi réttur nær m.a. til hvers kyns fjárhagslegra réttinda, upptöku- og útsendingaréttinda af öllu tagi, (t.d. í sjónvarpi, útvarpi, á internetinu og í síma), markaðsréttinda, kynninga og höfundarréttar.



Stjórn HSÍ skal setja nauðsynlegar reglur um nýtingu þessara réttinda.

### **56. gr. Heiðursformaður**

Handknattleiksþing má kjósa heiðursformann Handknattleikssambands Íslands ef 4/5 mættra þingfulltrúa samþykkja kjörið.

Heiðursformenn HSÍ hafa rétt til setu á fundum stjórnar sambandsins og á handknattleiksþingum og hafa þar málfrelsi. Heiðursformenn HSÍ koma fram fyrir hönd sambandsins þegar stjórn þess eða formaður kunna að óska og fela þeim það.

### **57. gr. Önnur atvik**

Stjórn HSÍ hefur lokaákvörðun um öll þau málefni varðandi handknattleik innan vébanda ÍSÍ sem lög þessi eða reglugerðir HSÍ ná ekki sérstaklega til eða þegar meiriháttar utanaðkomandi atburðir krefjast þess.

Í algerum undantekningartilfellum, svo sem ef ytri aðstæður og/eða fyrirmæli stjórnvalda hindra framkvæmd leikja, er stjórn HSÍ heimilt að gera breytingar á mótafyrirkomulagi skv. lögum þessum með setningu nýrra reglna eða reglugerða.

Þessi heimild nær til fækkun leikja, niðurfellingu leikja, breytingu eða niðurfellingu á úrslitakeppnum eða umspili eða ákvörðunar um niðurstöðu keppna án leikja. Slíkar breytingar skulu aðeins gilda fyrir yfirstandandi keppnistímabil hvert sinn.

Við brot á ákvæðum laga þessara hefur stjórn HSÍ heimild til að beita viðkomandi viðurlögum sem getið er um lögum þessum og reglugerðum sambandsins verði þeim ekki skotið til aganefndar eða dómstóls HSÍ.

### **58. gr. Sambandsslit**

Tillögu um að leggja HSÍ niður má aðeins taka fyrir á lögmætu handknattleiksþingi. Til þess að samþykkja þá tillögu þarf minnst 3/4 hluta atkvæða. Hafi slík tillaga verið samþykkt skal gera öllum sambandsaðilum grein fyrir henni í þingskýrslunni og tillagan síðan látin ganga til reglulegs þings. Með fulltrúakjöri sínu til þessa þings taka aðilar afstöðu til tillögunnar. Verði tillagan samþykkt aftur er það fullgild ákvörðun um að leggja HSÍ niður.

Ákveður það þing síðan hvernig ráðstafa eigi eignum HSÍ. Þeim má aðeins verja til eflingar handknattleiksíþróttarinnar í landinu.

### **59. gr. Gildistaka**

Lög þessi öðlast gildi strax og falla þá eldri lög úr gildi. Lög þessi skulu staðfest af framkvæmdastjórn ÍSÍ.